



Reglament da salarisaziun

per la vischnaunca Lumnezia

Cuntegn

I.	Determinaziuns generalas	3
Art. 1	Intent	3
Art. 2	Dretg subsidiar	3
Art. 3	Equalitad dallas schlatteinas	3
Art. 4	Assicuranzas e cuosts socials	3
Art. 5	Indemnisaziun per sesidas e lavur extraordinaria	3
Art. 6	Spesas	3
II.	Determinaziuns specialas	4
Art. 7	President communal	4
Art. 7.1	Vicepresident communal	4
Art. 8	Commembers dalla suprastanza communal	4
Art. 9	Officials e funcziunaris	4
Art. 10	Lavur cumina	4
III.	Determinaziuns finalas	5
Art. 11	Quen	5
Art. 12	Cass dispiteivels	5
Art. 13	Midadas	5
Art. 14	Vigur	5

Reglament da salarisaziun per la vischnaunca da Lumnezia

dils 7 da zercladur 2013 (rev. 25-04-2025)

La radunonza communal da Lumnezia,

sebasond sin art. 42 lit. e dalla Constituziun dalla vischnaunca Lumnezia dils 23 da settember 2012 (stan dils 24-11-2019),

concluda:

I. Determinaziuns generalas

Art. 1 Intent

Il present reglament da salarisaziun normescha l'indemnisaziun d'ufficials, funcziunaris e commembers da cumissiuns communalas, nun che prescripziuns specialas ni contracts stipuleschan enzatgei auter.

Art. 2 Dretg subsidiar

Aschinavon che quest reglament stipulescha nuot auter valan subsidiaramein la legislaziun da persunal e las prescripziuns dall'ordinaziun davart la salarisaziun dallas persunas d'instrucziun dil cantun Grischun.

Art. 3 Egalitad dallas schlatteinas

Las indicaziuns da persunas, funcziuns ufficalas ed indicaziuns professiunalas en quest reglament serefereschon sin omisduas schlatteinas.

Art. 4 Assicuranzas e cuosts socials

¹ Duront il temps da lavur per la vischnaunca ein ils ufficals e funcziunaris assicurai entras la vischnaunca encunter accidents e responsabladad.

² Da mintga indemnisaziun ad ina persuna privata vegn deducida sia cumpart allas assicuranzas dil provediment public (assicuranzas socialas per vegls, survivors ed invalids, prestaziuns supplementaras, disoccupai, indemnisaziun per perdita da gudogn / maternitad) sco era dil provediment professiunal (assicuranza da pensiun ed accident), aschilunsch ch'ei dat in'obligaziun da pagar contribuziuns. La vischnaunca presta la cumpart sco patruna e renda quen allas cassas dallas assicuranzas socialas.

³ Subsidiaramein valan las prescripziuns dallas assicuranzas socialas.

Art. 5 Indemnisaziun per sesidas e lavur extraordinaria

¹ Sesidas, uatgas etc. vegnan pagadas tenor il temps impundiu, nun ch'ellas vegnan indemnisadas cun ina pauschala ni dad autra vart. Parts dad uras lavur vegnan remuneradas en proporziun dil temps impundiu cun la salarisaziun per ura. Il viadi al plaz da lavur, respectivamein al liug da sesida ni uatga vegn quintaus sco temps da lavur, sche quel sesanfla ordeifer la vischnaunca.

² Lavur extraordinaria ei lavur che vegn prestada sin incarica speciala d'organs e cumissiuns communalas.

³ Sesidas, uatgas ed autra lavur extraordinaria che vegn prestada dad autoritads, funcziunaris e cumissiuns per la vischnaunca vegn per regla remunerada cun CHF 50 per ura.

Art. 6 Spesas

¹ Spesas vegnan indemnisadas mo leu, nua che quellas ein buca gia indemnisadas entras ina pauschala globala ni dad autras varts.

² Per viadis cun ils mieds publics vegnan ils cuosts effectivs da secunda classa indemnissai. Viadis fatgs cun auto privat vegnan indemnissai per km tenor reglamentaziun cantunala mintgamai vertenta.

³ Per l'indemnissaziun da dunsena e loschament valan las prescripziuns cantunalas mintgamai vertentas.

⁴ Telefons, portos etc. vegnan indemnissai tenor cuosts effectivs.

II. Determinaziuns specialas

Art. 7 President communal

¹ Il president communal vegn engaschad en piazza parziala da circa 50%.

² El obtegn in'indemnissaziun pauschala da CHF 62'500 ad onn per tutta lavur ch'el presta.

³ Tuttas spensas vegnan indemnissadas globalmein cun ina pauschala annuala da CHF 5'000.

Art. 7.1 Vicepresident

¹ Il vicepresident communal vegn indemnissad cun la pauschala annuala da CHF 3'000 per incumbensas ch'el surprinda en substituziun dil president communal.

Art. 8 Commembers dalla suprastonza communal¹

¹ Ils ulteriurs commembers dalla suprastonza communal obtegnan in'indemnissaziun pauschala da CHF 12'000 ad onn per sesidas da suprastonza, radunonzas communalas e la preparaziun da talas sco era per l'administraziun dil departament.

² Per l'ulteriura lavur sco era per la substituziun d'in departament vegnan els indemnissai supplementarmein tenor art. 5 da quest reglament.

³ Las spensas per tuttaz funcziuns e per tuts uffecis, ch'ils commembers dalla suprastonza communal prendan part, vegnan indemnissadas globalmein cun ina pauschala annuala da CHF 1'500.

Art. 9 Officials e funcziunaris

¹ Ei vegn fixau sequentas pauschalas per las lavurs generalas dils singuls officials e funcziunaris.

a. Cussegl da scola:

Parsura	CHF	2'000
---------	-----	-------

Commembers	CHF	500
------------	-----	-----

b. Cumissiun da gestiun:

Parsura	CHF	1'000
---------	-----	-------

Commembers	CHF	500
------------	-----	-----

c. Cumissiun da baghegiar:

Parsura	CHF	1'000
---------	-----	-------

Commembers	CHF	500
------------	-----	-----

² Quellas pauschalas vegnan pagadas, sch'il parsura ni il commember ei buca identics cul cau dil departament communal. Sesidas e lavur extraordinaria vegnan indemnissadas tenor art. 5 da quest reglament.

³ Ulteriurs officials e funcziunaris vegnan indemnissai tenor las determinaziuns en ils art. 5 e 6 da quest reglament.

Art. 10 Lavur cumina

Lavur cumina vegn ordinada dalla suprastonza communal ed indemnissada cun CHF 30 per ura.

¹ revediu tenor conclus dalla radunonza communal Lumnezia dils 25-04-2025

III. Determinaziuns finalas

Art. 11 Quen

¹ Per tutta lavur extraordinaria e per tuttas spensas ei da presentar in quen cun indicar cuortamein la lavur prestada.

² Il quen vegn controllaus e visaus dil cau dil departement cumpetent, dil parsura dalla cumissiun pertuccada ni dil president communal.

Art. 12 Cass dispiteivels

En cass dispiteivels decida la cumissiun da gestiun davart l'indemnisaziun per lavurs supplementaras dils departements communs ed auters ufficials e funcziunaris.

Art. 13 Midadas

La cumissiun da gestiun ha d'examinar quest reglament silmeins mintga 2 onns e ha da far eventualas propostas per midadas ed alzaments da pagas ed indemnisaziuns alla radunonza communal.

Art. 14 Vigur

Quest reglament va en vigur retroactivamein cun igl 1. da schaner 2025.

Approbau dalla radunonza communal Lumnezia ils 7 da zercladur 2013 e revediu entras la radunonza communal Lumnezia ils 25 d'avrel 2025.

Il president communal

Daniel Solèr



la canzlista communal

Silvana Caviezel